

摘藻堂四庫全書薈要

集部

欽定四庫全書薈要

集部

明詩綜卷九十四

五

詳校官編修臣汪鏞



欽定四庫全書薈要卷二萬五百六十七

集部

明詩綜卷九十四 屬國

翰林院檢討朱彝尊編

高麗

靜志居詩話高麗文教遠勝他邦自元以前詩
曾經大司成雞林崔濯彥明父選錄目曰東人
之文凡二十五卷度必有可觀惜無從訪求今
之存者僅會稽吳明濟子魚朝鮮詩選而已遵
王錢氏為王氏諸臣白寃可謂發潛德之幽光
矣予更證以高麗史東國通鑑東國史畧殊域
周咨錄皇華集輜軒錄訂其異
同補其疎漏論次稍加詳焉

僕遜一首

遜回鶻人初名百遼世居僕輦河因以為氏家
世仕元順帝時中進士歷翰林應奉文字宣政
院斷事官選為端本堂正字恭愍王七年避兵
東來賜第封高昌伯改封富原侯有近思齋逸
藁

山雨

一夜山中雨風吹屋上茅不知溪水長祇覺釣船高

鄭夢周 三首

夢周字達可高麗迎日縣人初名夢蘭又名夢
龍既長改今名恭愍王九年應舉擢第一人累
官政堂文學進三司左使改進賢館大提學知
經筵春秋館事兼成均大司成領書雲觀事初
封永原君加封益陽郡忠義君為李成桂所殺
梟其首于市籍其家後贈大匡輔國崇祿大夫
領議政府事修文殿大提學兼藝文春秋館事

益陽府院君謚文忠有圃隱集

詩話靖難君臣改修明太祖實錄因方孝孺而其父克勤循吏也乃沒其實黃觀景清修書傳會選而削其名且誣方先生叩頭乞哀觀於鄭麟趾高麗史夢周圖李成桂不克為芳遠所殺芳遠猶知贈官易名麟趾等亦直書其事是篡竊之芳遠賢于長陵而下國之史官勝于楊士奇輩多矣可歎也夫

感遇

人心如雲雨翻覆在須臾素絲變其色安能復厥初
啞羣飛鳥集我中田廬雌雄竟莫辨涕泣空欷歔

使日本書懷

水國春先動天涯客未行草連千里色

一作綠

月共故鄉

明游說黃金盡思歸白髮生男兒四方志不獨為功名

偶題

赤葉明邨徑清泉漱竹根地偏車馬少山氣自黃昏

李穡一首

穡字頴叔中征東省鄉試第一明年赴元廷試
擢二甲進士授應奉翰林文字累官政堂文學

封韓山府院君進位門下侍中與鄭夢周同謀
去李成桂放于韓州再放衿州徙驪興尋封韓
山伯卒謚文靖有牧隱集

早行

凌晨問前路曉色未全分帶月馬頭夢隔林人語聞樹
平連野霧風細繞溪雲異國堪愁絕南天無鴈羣

李崇仁一首

崇仁字子安京山府人恭愍王時登第官至簽

書密直司事同知春秋館事李成桂墓立以鄭
夢周黨削職遠流有陶隱集

挽金太常

禮儀今太叔史學昔公羊四十人間世千秋地下郎空
庭餘敗草老樹逼一作耿斜陽俯仰成陳迹經過只自傷

李詹一首

詹洪州人恭愍王時及第授藝文簡閱三轉為

正言歷知申事

雜咏

舍後桑枝嫩畦西薤葉稠陂塘春水滿
穉子解撐舟

權近一首

近初名晉字可遠一字思叔號陽邨高麗秀才

有應制集

詩話陽邨至京師高皇帝優禮待之賜衣賜食
爰命賦詩陽邨先之以本國廢興之由道塗經
過之所次之以本國離合之勢山河之勝與夫
鄰境之情形魚述東人感化之意既成精華炳
蔚音響鏗鏘帝覽之稱歎因命與劉公三吾許
公觀景公清戴公德彛張公信輩偕游南北市

來賓重譯鶴鳴醉仙諸樓帝又賜以御製三詩
此洪武丙子歲事建文四年春朝鮮恭定王李
芳遠令知申事朴錫下議政府鑲板以行於是
嘉靖大夫藝文館提學國人李詹暨奉使翰林
史官兵部主事金陵端木孝思均為作序而淮
南陸顯蕃陽祝孟獻題詩其後焉陽邨賜游酒
樓寶錄未之載予所見應制
集則天順元年朝鮮本也

題鶴鳴樓

鶴鳴樓上久徘徊
珮珊珊緩步來
已喜清歌和寶瑟
況看纖手奉金杯
南臨帝甸山河壯
北對天門日月開
得被內臣宣聖澤
六街三日醉扶回

權 遇一首

遇爵里未詳

竹長寺

衙罷乘閒出郭西
殘僧古寺路高低
祭星壇畔春風早
紅杏半開山鳥啼

金九容一首

九容初名齊閔字敬之安東人中進士拜三司
左尹與李崇仁權近等上書都堂阻迎北元使

竄竹州召為左司議大夫終成均大司成尋流
大理衛有惕若齋集

詩話敬之年十六中進士國王命賦牡丹詩敬
之居首既因諫迎元使被流扁所居曰六友堂
以詩酒自娛亦
瀟灑之士也

江水

江水東流不復回雲帆萬里向西開
菰蒲兩岸微風起楊柳長堤細雨來
別夢遠迷箕子國旅愁獨上楚王臺
行行見說巫山近一聽猿聲轉覺哀

趙云伋一首

云伋高麗豐壤縣人恭愍王六年登第調安東
書記累轉閤門舍人以刑部員外郎從王南幸
遷國子直講歷全羅西海楊廣三道按廉使辛
禍三年起授左諫議大夫辛昌立召拜僉書密
直司事升同知恭讓王二年出為雞林府尹李
芳遠篡立授江陵大都護府使以病辭又拜簡
校政堂文學不受祿

詩話云侂以典法郎退居尚州露陰山下自號
石礪棲霞翁出入騎牛超然有世外之想及轉
判典校復退居廣州古垣江邨營板橋沙平兩
院自稱院主敝衣草履與役徒同勞苦李氏簒
立爵祿不受臨終自誌其墓云趙云侂本豐壤
人高麗太祖臣平章事趙孟三十代孫恭愍代
興安君李仁復門下登科歷仕中外佩印五州
觀風四道亦無聲績亦無過讐年七十三病終
廣州古垣城無後以日月為珠璣以清風明月
為奠而葬于古揚州嵯峩山南銘曰孔子杏壇
上釋迦雙樹下古今聖賢人豈有獨存者可謂
嶽奇跌宕之士矣錢氏列朝詩定為嘉靖中人
然當以鄭氏
高麗史為正

即事

荆門日午喚人開步出林亭石滿苔昨夜山中風雨惡
一溪流水泛花來

朝鮮

詩話高麗朝鮮一也然王氏建國本名高麗迨
李氏稱藩始更朝鮮未可以王氏死事之臣入
之朝鮮也今以李芳遠襲位之後諸陪
臣別為朝鮮庶幾無戾通鑑綱目書法

鄭道傳一首

道傳官右軍總制使芳遠立召為奉化郡忠義

君

重九

故園歸路渺無窮
水遶山圍第幾重
望欲遠時愁更遠
登高莫上最高峯

曹庶一首

庶嘗使明流金齒國道經五靈廟題詩

五靈廟

邨南邨北雨淒淒
古廟靈風楊柳低
十里江山看枕上
竹林深處午雞啼

鄭希良一首

希良爵里未詳

偶題

十年一劍遠平戎
勲業蕭條歎轉蓬
瘴氣曉來雲似墨
山容霽後雪為峯
地連龍穴天多雨
門對鯨波晝亦風
幾被故人吟桂樹
客牕落莫傲歸鴻

朴原亨 三首

原亨官戶曹判書調刑曹判書

詩話天順元年使朝鮮者翰林修撰吳陳鑑緝
熙太常博士會稽高閏居平三年奉使則刑科
給事中餘姚陳嘉猷世用四年奉使則禮科給
事中海鹽張寧靖之原亨凡三充館伴靖之贈
詩云朝鮮賢臣朴判書老成文
物非凡儒蓋其國中翹楚也

登漢江樓次張黃門韻二首

遠岫橫如黛芳郊綠漸平歸鴉翻夕照啼鳥弄春晴暫
得新知樂還教別恨生關山逾萬里何處望燕京
春光方浩蕩嵐翠轉霏微雪浪搖歌扇汀蘭襲舞衣素
鱗時潏潏輕燕已飛飛景物看如此從教緩緩歸

渡大同江次韻

遠傳丹詔促行裝暫駐星槎淚水陽江浦雪消春意動
郵亭日暖客懷長一杯且可酬佳節萬里無勞憶故鄉
野闊天低山似畫不禁詩思入蒼茫

申叔舟二首

叔舟字汎翁自右弼善歷禮曹判書積官至議
政府領議政以功封高靈君有汎翁集

詩話考叔舟於景泰二年八月國人鄭麟趾進
高麗史表修史官三十二人叔舟與焉書銜曰

中訓大夫集賢殿直提學知制教世子右輔德
兼春秋館記注官知承文院事臣申叔舟天順
元年官議政府右贊成四年進左議政成化七
年十二月奉國令撰海東諸國紀書成作序書
銜曰輪忠協策靖難同德佐翼保社炳幾定難
翊戴純誠明亮經濟弘化佐理功臣大匡輔國
崇祿大夫議政府領議政兼領經筵藝文館春
秋館弘文館觀象監事禮曹判書高靈府院君
臣申叔舟紀書日本代序及八道六十六州頗
詳所著詩集二十卷孫從復編寧都董尚書越
使其國
為作序

陽德驛

北塞歸遠塗千里度陵谷日暮投陽德館宇半茅屋輕

風吹枯枝短垣依斷麓雨歇低行雲山深聽鳴鹿坐久
正蕭然清溪走寒玉遠客自無寐呼童剪殘燭

次韻登漢江樓

綺席登樓迴春江碧玉流早梅香澗曲芳草滿汀洲賓
主歡情洽江山喜氣浮良辰須酩酊莫惜更遲留

權擘三首

擘由吏曹判書累遷右議政

詩話陳緝熙使朝鮮國人賦詩繼和者自朴原
亨申叔舟外有若仁順府尹寶文閣提學金守

溫領議政鄭麟趾禮曹參判盧叔全禮曹判書
洪允成兼成均司成金鈞金末左承旨曹錫門
而權擘為之作序書銜曰吏曹判書集賢殿大
提學知春秋館事後二年進議政府右贊成明
年進右議政其序畧云詩者人心之感物而形
於言也心之所感既不能無邪正故言之所形
亦不能無是非惟聖人在上則人皆親被其化
以成其德有以得失性情之正故其所感而發
於言者粹然無不出於
正矣其持論頗中繩尺

登漢江樓二首

南樓初縱目檻外俯長流雪盡落梅塢春深芳草洲
湖光清豔豔山氣暖浮浮使節陪登眺斜陽更挽留

城南一樽酒相對暮山青
小艇橫前渡孤帆落遠汀
江雲連復斷主客醉還醒
落筆龍蛇動高懷入冥

楊花渡次陳給事韻

山亭置酒近江湄興至頻傾白玉卮
萬里歸來多客恨一時登眺得神怡
高標已覺冰霜操新調還聞白雪詞
北去他年如記憶也應飛夢到遐陲

尹子雲三首

子雲官都承旨

登漢江樓次韻 三首

高軒時暫駐勝地許相招詩律吟邊改愁懷醉後銷汀
花經雨動岸柳受風搖忽起中流興春心付短橈

何處窮遐矚丹梯近百層陽坡先有草陰壑已無冰美
景時相引風懷晚尚仍欲成賓主好觴詠正堪憑

風光觸處好春氣望中微山淨濃如畫江深綠染衣夢
隨蝴蝶亂心逐野雲飛人世難開口惟須倒載歸

李克堪 一首

克堪官左承旨

登漢江樓次韻

遲日晴方好和風暖更微
山陰追禊事沂上換春衣
劇飲金卮滿清譚玉屑飛
牆頭輕燕舞有意惱人歸

徐居正一首

居正字剛中議政府左叅贊有北征藁

詩話成化丙申祁主事順使朝鮮居正充遠迎
使既為館伴因時與倡和為序其北征藁北征
藁者天順庚辰居正奉王命入覲而作也順稱
其博古通經長篇短章淵淵乎有本浩浩乎不

窮與中國之能詩
者殊不相遠云

即事

小沼如盤水淺清
菰蒲新發荻牙生
連筒引却前溪水
養得芭蕉聽雨聲

申從濩一首

從濩叔舟孫官成均直講

傷春

茶甌飲罷睡初輕
隔屋聞吹紫玉笙
燕子不來鶯又去

滿庭紅雨落無聲

許琮六首

琮字宗卿安興人由進士為吏曹判書積官至
參政府議政有尚友堂詩集

詩話孝宗即祚之初以右春坊右庶子兼翰林
院侍講寧都董公越工科右給事中上元王公
敞頒詔于朝鮮宗卿時為館伴繼和之作綽有
唐人風格句如春歸飛鳥外天闊落帆中細雨
全沈樹孤城半帶烟東風瓜蔓水斜日竹枝歌
風急搏羊角波翻起鴈羣官橋晴曬網野渡晚
維舟俱清婉可誦董公為作序稱其音律諧暢
蕭然出塵非虛譽也董公後仕至南京工部尚

書贈太子少保謚文僖王公亦仕至太子少保
兵部尚書贈太子太保宗卿祖懋字原德官奉
常有梅軒集曾祖錦字在中官
判書有野堂集見龔吳兩公序

登浮碧樓次韻

渚草平如翦江雲濕不飛餘霞飄綺席新浪濺苔磯古
寺蘿垂壁漁家水浸扉眼前多少景惆悵客將歸

安興道中次王黃門韻

韶光如酒著人迷漫把霜毫取次題山北山南春雨歇
隔林紅日鵲鳩啼

登鳳山樓次韻

獨倚雕闌帽影斜
客中哀鬢已非鴉
不禁杜宇聲聲苦
啼盡東風第一花

松林晚照次韻

一邨桑柘夕陽微
芳草叢生柳絮飛
已過蘭亭修禊後
風寒猶未著春衣

所串館道中即事次韻二首

數株官柳野橋傍
飛絮紛紛撲馬香
江雨欲來龍氣黑

水風吹作十分涼

家在江南水竹邨
鳥啼花落掩柴門
年年犇走東西路
坐席何由得暫溫

成 覩一首

覩西京觀察使

詩話朝鮮兵曹判書魚世謙弘治元年序皇華
集錄覩詩四首王尚書稱為成中樞又稱成同
知又為作風月樓記則云西京觀察使惜
成化一朝奉使之詩無存未能詳考矣

擬古

今日良宴會嘉賓滿高堂綺肴溢雕俎美酒盈金觴左
右燕趙姬眉目婉清揚朱絃映皓腕列坐彈宮商流年
雙轉轂倏忽鬢已霜相逢且為樂何用苦慨慷金張竟
何許纍纍歸北邙

成侃一首

侃爵里未詳

囉噴曲

為報郎君道今年歸未遲江頭春草綠是妾斷腸時

盧公弼二首

公弼安州人官戶曹判書

詩話弘治五年兵部郎中南昌艾璞德潤使朝鮮公弼充遠接使亦有詩贈答知成均館事洪貴達序之

開城太平館次艾兵部韻

斜陽策馬過孤城想像當年玉作京國破山河渾似舊
時平民物不知兵春深古館生禾黍水涸荒池插稻稭
往事悠悠何處問鶴歸華表月空明

鳳山樓次董內翰韻

畫樓登眺帽簷斜苔壁詩成字點鴉幽興未闌天欲暮
一簾疎雨落桐花

李 荇 三首

荇字擇之官議政府右贊善

詩話世宗入繼大統嘉靖元年奉使朝鮮者翰林修撰歛唐皋守之兵科給事中涿州史道克弘其時館伴惟荇詩最多餘若金議政詮南議政衮鄭寺正士龍李寺副希輔尹承旨希仁徐承旨厚蘇司成世讓李判書沆又不知爵秩者二人洪淑成雲皆有賡酬之作然必以荇為巨

馬擘

開城館次董圭峰韻

行行繇道路日日因風沙去壑悲流水投林羨暮鴉窮
冬催暖律宿草欲新芽更憶吾廬好寒梅幾樹花

過臨津江

臨津催早發問渡即清江緩擊中流楫徐牽上水艘寒
魚依石竇曉日照蓬牕有客忘機坐飛來白鳥雙

荅鹿峯給事

歸袂怱怱不可攀銷魂祇是黯然間鹿峯正在千山外
鳳節全無半日閒今日預將詩作別他宵何忍月同還
此生難復陪清賞悵望雲霄玉筍班

李希輔二首

希輔字和宗由禮賓寺副正歷官同知中樞府
事有安分堂詩

蔥秀山次唐先生韻

客行值殘臘長程催短景天寒鬚易冰葉脫木無影揮

鞭發安城露濕衣袖冷迤邐度雲漢邂逅逢峻嶺緬懷
董學士曾此憩負靜突兀數尺碑其文信蔚炳往事浮
雲空幾年孤此境茲山真自幸四牡又來騁留詩繼前
賢頓覺仙凡迴而我苦駕緩古訓蒙不省何幸接詞源
飛流激奔猛涯涘不能窺况敢得要領無心和陽春有
懷徒耿耿願言借餘光破我心昏暝

次唐修撰夜宿太平館醉起韻

雄辭海生波醉墨鴉翻壁無使我公歸於焉作佳客

蘇世讓八首

世讓字彥謙初官成均館司成遷戶曹判書歷
議政府左贊成有清心堂詩

詩話彥謙自嘉靖元年即與使臣唱和至十六
年十八年凡三充館伴詩雖平行亦稱具品

箕子操

天疾威兮不祚我商
目窅窅兮未見日光
王聖善兮我無良欲
瞑我目兮羞我先王
吁嗟乎我寧為奴兮
寧忍發出狂

東方五章荅陳給事

維我東方有山蒼蒼有水泱泱君子戾止維其有章

我有嘉賓我心則愉貽我以佩琚

我有嘉賓既敬且久貽我以佩玖

何以報之報之以椒蘭有德斯馨唯以永歎

何以報之報之以芰荷服之無數其樂如何

蔥秀山次唐先生韻

我並青山行山行信多景淵潭清見底杉檜翠交影況

當沍陰天風日淒以冷蕭蕭晚雨霽突兀見斯嶺巖巖
互迴合洞壑極沖靜有如畫圖開不用丹青炳曩時董
學士探勝得真境眷茲心賞諧更將文字騁至今凜清
風未覺歲月迴賞音會有人二妙復來省陽春一繼和
筆力肆豪猛小子忝後塵盛事心已領攬舊又感今中
懷益耿耿沈吟久佇立前峯欲舍暝

漢江陪宴

斷徑緣崖轉高樓面水開杯盤供宴賞歌鼓殷晴雷沙

遠迷烟樹潮迴沒釣臺江山如許勝應為使星來

荅鹿峯給事

珍重龍門豈易攀屢承清誨笑談間極知後會終無地
其奈前程苦未閒佳境總為忙裏過好詩空貯橐中還
明朝悵望雲山遠杳杳仙蹤隔鷺班

良策道中次韻

春陰釀雨欲淒迷長路愁衝滑滑泥奔霧逐風歸遠岫
亂流經野赴前溪潮從小浦平時上燕掠平蕪盡處低

高卷湘簾望山氣夕陽猶在短峯西

太平館次韻

望眼山連北歸心月向西羈魂與別恨愁殺五更雞

初見杜鵑花次雲岡修撰韻

際曉紅蒸海上霞石崖沙岸任歌斜杜鵑也報春消息
先放東風一樹花

鄭士龍一首

士龍字雲卿鼎津人由內資寺正遷刑曹判書

歷漢城府判尹改戶曹判書再改吏曹判書階
資憲大夫有湖陰草堂詩集

詩話雲卿嘉靖中五充館伴道交禮接為羣公所稱唐守之贈詩云鄭子有詩才豈在鷓鴣下龔雲岡則謂其沈著冲澹不為綺麗豔冶之辭有唐人之遺意嘗築十玩堂于鼎津十玩者竹梅松菊水石并楮研筆墨而十也守之及史給事克弘皆為之賦詩及華亭張行人承憲奉使國王刊其詩入皇華集俾雲卿序之謂古之詩人類皆有為而作未嘗為無益之辭是亦得詩人之旨者也句如不謂交歡地翻成送別亭具饒韻致

長虹

垂虹屈曲跨清波
藻荇香中笑語過
恰似松江三百尺
艤船聞唱采菱歌

金安老二首

安老字頤叔歷官議政府左議政領書筵監春
秋館事兼弘文館藝文館大提學知成均館事
階崇祿大夫有明虛軒集

詩話朝鮮君臣最稱好事使者輜軒一至即命
館伴遠迎屬和詩章連篇累牘龔修撰用卿鳴
治吳給事希孟子醇於嘉靖十六年奉使國王
遣陪臣十人陪燕漢江之上汎楊花渡登龍頭

峯縱觀江山之勝十人者金議政安老蘇判書
世讓尹判書仁鏡金參贊麟孫沈判書彥光吳
判尹潔許參贊洽鄭判書士龍許參判沆朴承
旨洪鱗皆國中名士此外復有金議政謹思尹
議政殷輔黃承旨憲朴承旨守良黃承旨琦鄭
參判百朋開城韓留守胤昌京畿金觀察希說
平安道李觀察龜齡中樞李同知希輔咸有詩
篇繼和極東國一時之盛皇華是集安老實序
之

望遠亭次韻

幽興牽人惱遊蹄豈惜遥殘雲橫浦口飛鷺割山腰江
穩開輕纜潮生沒斷橋異鄉歸思促心趁紫宸朝

漢江陪宴次韻

人間不信有丹丘，漢水仙舟即十洲。
夕日蘸波紅漾漾，江烟連樹翠浮浮。
晴川有句還題壁，長笛何人更倚樓。
天上明朝遙悵望，遐陬能復記茲遊。

尹仁鏡二首

仁鏡由禮曹判書改戶曹積官至議政府領議
政

太平館次韻

紅惜花飄岸青憐柳拂橋江風吹颯颯蓬雨打蕭蕭簾
卷樓橫笛山空谷響樵雙旌拚賞去回首海天遙

登漢江樓次韻

郭外澄江江上臺登臨頓覺隔氛埃遙山雲斂雨初霽
極浦波平潮又来明月似迎星使出輕帆須趁晚風開
佳辰佳境兼佳客乘興休停到手杯

金麟孫一首

麟孫官議政府左參贊

次韻別吳副使

臨分盡醉側烏紗長路高低日易斜
好雨多情知滑道輕風惜別解飛花
留春縱欲兼留客戀闕其如又戀家
一去茫茫遼薊遠銀河何處問仙查

沈彥光一首

彥光字子求官吏曹判書

詩話子求望遠亭詩有白鴈依寒渚青驢度小
橋之句頗饒晚唐人風韻徐敬德花潭集有次
留守沈相國彥慶
韻詩當是其兄弟

太平館次韻

春鳥花邊啼暮鴉樹頭宿何事遠游人不秉良宵燭

許洽一首

洽參政琮之孫官至議政府右參贊

詩話洽與弟沆俱有詩名嘗集其先世詩號陽川世橐沆官吏曹參判兄弟皆執國政詩有漁店日斜遥笛起海門風急曉帆開之句亦覺爽氣殊倫

漢江陪宴次韻

綠水靈源自五臺新添好雨絕塵埃長洲芳草移船近

遠渚輕鷗避櫂來景物盡供今日興襟懷須向此中開
猥參勝引非吾分擬向巖前倒玉杯

國有酒巖酒
流出其下

金謹思一首

謹思官議政府領議政

別吳副使次韻

方空歲歲感輕紗半榻香烟一穗斜
萬里往來蝴蝶夢三春開落杜鵑花
吹殘遠笛誰懷土過盡良辰不在家
日暮關山雲樹隔天津何處泊靈查

尹殷輔一首

殷輔官至議政府領議政

游漢江次韻

江上天然百尺臺澄波無綠鏡無埃茫茫極浦舟南北
渺渺長空鳥去來汀草有情吟外碧岸花隨意望中開
叨陪高會誠踰分乘興還須倒百杯

黃琦一首

琦由承政院右副承旨遷都承旨

開城

白駒難自繫青眼更離筵江海相忘處烟波欲暮天落
花飄醉袖芳草入吟鞭翰墨真餘事功名正妙年

金安國一首

安國字國卿號慕齋官刑曹判書至領議政有
慕齋集

詩話使東國者前有張芳洲後有華鴻山皆中
朝之詩伯鴻山至日館伴十有一人非不每篇
踵韻然中律者寡矣十一人者議政府領議政
尹殷輔議政府右議政金克成議政府左參贊

柳灌戶曹判書尹仁鏡吏曹判書成世昌禮曹判書李龜齡工曹判書尹世豪漢城府判尹鄭士龍承政院都承旨黃琦左承旨申瑛及安國也鴻山留國中僅五日而返此見於皇華集者不能多焉

開城太平館次韻

溫黓陵廢井空青種稌田荒但記名舊跡不隨時代滅
停驂落日一傷情

申光漢一首

光漢字漢之由吏曹判書官至正憲大夫議政

府左參贊兼知成均館事弘文館藝文館大提
學同知書筵春秋館事有金齋集

詩話舊典使于東國必命儒臣給舍迨嘉靖二
十三年恭僖王薨遣使賜謚及賻改命司禮監
太監郭玞副以華亭張行人承憲於是中官偕
行道塗無酬答之作禮成而返乃緘詩以寄國
人爰有吏曹判書申光漢議政府右贊成柳仁
淑成均館司藝林亨秀禮曹正郎李洪男戶曹
參判沈連源黃海道觀察使權應挺相與追
和之仍刊為皇華集一卷而鄭士龍為作序

暮景

樹密深濃翠孤烟澹作雲前邨聞犬吠暗路草中分

林百齡一首

百齡官議政府右議政

詩話張行人既使東國諭祭恭僖王憚禮成而
返明年榮靖王嵒復薨於是別選廷臣遣行人
長安王鶴往賜祭及謚陪臣以詩贈答議政府
右議政林百齡禮曹判書尹漑工曹判書任權
吏曹參判慎居寬成均館大司成李潤慶司藝
崔演承政院右副承旨洪敘疇奉常寺僉正朴
忠元開城府留守李潔京畿觀察使宋麒
壽而鄭士龍尹仁鏡申瑛李洪男亦與焉

游漢江次韻

王室千年作翰藩欣聞使節頌聲喧登樓未倦陪歡賞

汎水還容接笑言舉網漁人貪似獺操舟穉子捷於猿
夷猶領得滄洲趣還向春風望故園

李潤慶一首

潤慶官成均館大司成

漢江次韻

漢江形勝表東藩使節登臨鼓吹喧對景每憑詩遣興
通情猶借譯傳言忘機自幸參沙鳥隨世何殊束檻猿
回首風光堪遠矚雨催新綠遍郊園

李 潔 一首

潔官開城府留守

詩話花潭集有贈
留守李相國潔詩

泛臨津江

臨津傳勝事駐節是仙舟
烟幕沙邊樹風迴水面鷗
笑談情不淺詩酒興難收
絕域萍蓬會無忘此日遊

徐敬德 二首

敬德朝鮮生員有花潭集

詩話花潭講學專以周邵為宗詩亦效法擊壤以金安國引薦授參奉力辭集中酬和者李相國深朴相國祐沈相國彥慶李留守龜齡金都事洪林正字蒼沈教授義張教授綸趙上舍王沈別提宗元朴參奉溉而朴民獻頤正金漢傑士伸趙昱景陽金惠孫彥順以及黃元孫許太輝等疑皆從游講學者也

山居

花潭一草廬蕭灑類仙居
山色開軒近泉聲到枕虛
洞幽風澹蕩境僻樹扶疎
中有逍遙子晨昏聞讀書

靈通寺次題壁韻

松溪一路入青林林下禪居畫亦陰觸石泉流三面轉
倚天山色萬重深清歡直欲朝連夜勝引應難後繼今
數局枯碁談笑裏不知雲日已西沈

辛應時一首

應時官校書館校理

詩話隆慶元年以即位頒詔朝鮮欽縣許公國
南昌魏公時亮持節以往是時恭憲王恒又薨
兩公返命共成詩一卷國中屬而和者止工曹
判書朴忠元一人議政府左贊成兼知書筵春
秋館事洪暹序之曰小邦不幸兩公之來適丁
大戚滿目愁慘無意於覽物輒題逐篇和進亦

非有喪者所當為所以倡之少而和之寡也於此足徵其為秉禮之國矣明年衡陽歐希稷以行人奉使館伴卒應時朴淳等始復有贈送詩焉

送歐大行還朝

鴨綠江頭送櫂聲東風吹淚若為情人間離別傷今日
天上音容隔此生衡浦鴈迴驚遠夢洞庭春盡渺歸程
遙知萬里相思處南斗橫斜片月明

朴淳一首

淳官吏曹判書

太平樓次歐公韻

來遊萬里魂應斷，獨倚青冥思更賒。
天濶楚鄉飛客夢，路窮蓬海駐仙查。
山連睥睨雲長暝，春半池塘草欲花。
簾外夕陽看漸沒，消愁惟有醉流霞。

李珣二首

珣德水人官議政府右贊成

詩話吾鄉蔡陽黃公以編修使朝鮮在萬歷十
年八月自珣以下三人暨許狀元葑皆充館伴
者也

辱編修黃公示沿塗之作賦呈

丁年行役記吾曾
遼薊修塗客念憑
歷歷道邊孤店月
依依天上早朝燈
身回蝸殼何由轉
班入蛾眉不再能
玉署新詩分物色
瑤臺指點一層層

送黃公還朝

長川冰雪覆寒沙
此日愁聞入塞笳
兩地雲泥分席上
一江南北即天涯
徒勞永夜游仙夢
漸遠明河貫月查
珍重詩篇兼贈處
媿將燕石報瓊華

金 瞻一首

瞻官吏曹佐郎

送別正使黃公還朝

月落關城鼓角鳴，星軺夙駕向神京。
長江自昔分南北，兩地從今隔死生。
接塞凍雲迷別路，亂山晴雪照行旌。
那堪獨夜龍灣館，愁對寒燈夢不成。

高敬命一首

敬命官司瞻寺僉正

別正使黃公

好音無路託西歸
心逐仙查自奮飛
鴨水寒波添別淚
鵲岑晴雪點征衣
謾將便面藏懷袖
何計承顏御豹鞵
匏繫海濱身已老
百年形影欲誰依

柳根一首

根字晦夫狀元自號隱屏居士有西垞集

詩話蘭岵朱公以萬厯丙午使東藩柳晦夫李孝彥許端甫為館伴公攜有唱和詩卷歸墨蹟

今存予家

萬厯丙午五月送朱蘭岵太史還朝

玉節東來鳳詔頒，暮春江上乍承顏。
高懷獨出形骸外，雅賞長存水石間。
目斷未堪魂夢遠，形留只得鬢毛斑。
相思別後如明月，萬里清光不可攀。

李好閔一首

好閔字孝彥，探花樞相，有五峯書巢集。

郊院別席

西郊菡萏綠盈池，折得芳華贈別離。
此去金臺情不斷，

寸心真似藕中絲

許 筠 三首

筠舉進士第一萬歷壬午官成均司成

熊州引

一作牽
情引

熊州樓觀飛雲外
白簡霜威凌早蓋
組練三千引繡衣
羅裙二八鳴珠帶
九華之帳香氤氲
寂寂瓊樓午夜分
亭里佳人嬌薦枕
巫山仙子渺行雲
牽情夢罷看歸路
別恨迢迢隔烟霧
妾心苦作藕中絲
郎意何如荷上露

錦水東西楊柳新往來愁殺斷腸人欲將心事寄青鳥
芳草年年空復春

謝編修黃公惠詩扇

越索傳輕策良工制作勞古藤分剡曲寒竹截湘皋灑
落留清什飄揚動彩毫書因逸少重價為謝安高自得
雙金贈還同一字褒年年火雲日長是憶仙曹

奉別正使黃公

迢遞飛旌入漢關鴨江晴雪展冰紈仙蹤已隔雲霄外

老九十四
晤語猶存夢寐間中歲不堪頻送客此生難卜再承歡
空餘一握蒲葵扇分得清風滿袖還

許筠三首

筠字端甫葑之弟與兄皆舉進士第一自號白

月居士

送參軍吳子魚還天朝

國有中外殊人無夷夏別落地皆兄弟何必分楚越肝
膽每相照冰壺映寒月倚玉覺我穢唾珠復君絕方期

久登龍遽此成離訣
關河路險巖秋郊方蠲熱
此去慎行休
毋令阻回轍
東陞尚用兵
海嶠日流血
須憑魯連子
却秦掉寸舌
勿嫌九夷陋
勉徇壯夫節

陪吳參軍子魚登義城

平野垂天末
長江接海流
雨餘多牧笛
風急少行舟
獨鶴盤雲去
雙鳧就渚浮
相憐無限意
空憶仲宣樓

晚詠

重簾隱映日
西斜小院回
廊曲曲遮疑是
趙昌新畫就

竹間雙鶴坐秋花

金尚憲

四首

尚憲字叔度有朝天錄

聞柝

擊柝復擊柝夜長不得息何人寒無衣何卒飢不食豈
是親與愛亦非相知識自然同袍義使我心肝惻

九日

黃縣城邊落日朱橋驛裏重陽菊花依然笑容鬢髮又

度秋霜

早春

水際城邊野馬飛
漸聞宮漏晝間稀
東風日日蘼蕪綠
塞北江南總憶歸

初至登州

南商北客簇沙頭
畫鷁青簾幾處舟
齊唱竹枝聯袂過
滿城明月似揚州

崔澥二首

澥字彥沈海州人進士有楊浦集

李栗谷云彥沈詩似丹穴

鳳雛聲纔出穴已足驚人讀之風露爽然殆非食烟火人語置之盛唐詩中亦無媿也

鄭經

世云彥沈信口吐詞皆成瓊屑

任叔

英云彥沈服膺盛唐其詩清越俊逸

詩話彥沈八齡能詩年十八中進士二十二而沒嘗輕衫幅巾登鏡浦臺倚柱而吟大書于壁曰蓬萊一入三千年銀海茫茫水清淺鸞笙今日獨飛來碧桃花下無人見國中疑為真仙許葑愛而和之其逝也李廷龜申欽鄭協李綏祿趙續韓具寵韓浚譙皆賦詩以悼寵詩有云楊浦烟花三月酒匡山風雪十年燈句亦自佳

春日

楊柳依依江水生
杏花如雪落無聲
青霞卷盡畫樓出
中有玉人吹玉笙

贈人

碧溪哀玉響楓林
山水孤懷恣遠尋
仙子不來秋已暮
古樓斜日獨登臨

李廷龜一首

廷龜號栗谷

崔彥沈輓詩

有友今亡矣無端夢見之長尋臨訣語獨紀贈行詩宛
爾龍蛇字森然玉雪姿青山一杯土哀白淚雙垂

明詩綜卷九十四

欽定四庫全書薈要卷二萬五百六十八

集部

明詩綜卷九十五

屬國

翰林院檢討朱彝尊編

朝鮮

林悌一首

靜志居詩話自悌至李仁老詩見朝鮮
采風錄其官爵世次未詳姑系於此

中和塗中

羸驂馱倦客日暮發黃州可惜踏青節未登浮碧樓佳

人金縷曲江水木蘭舟寂寂生陽館孤燈夜似秋

白光勲一首

縣津夜泊

旅泊依津口重遊屬暮年鐘聲隔岸寺人語渡湖船月
上蒹葭遠燈橫島嶼連夜深風更急落鴈不成眠

崔壽城一首

驪江

日暮滄江上天寒水自波孤舟宜早泊風浪夜應多

趙希逸一首

謫中

歸心日夜關以東歸計即今還墮空一年春動萬里外
孤山月出千林中愁來但覺此身遠醉後不知吾道窮
瓊州雷州何許地古人今人同不同

張漢瞻云
意致磊落

林億齡一首

送友還山

塵土無憂染素衣蕭條石徑接柴扉飄然又作抽簪計

夢逐白鷗江上飛

奇邁一首

直禁詠懷

南山松柏幽北山煙霧深遊子暮何之庭樹生秋陰歸
雲度遙峯宿鳥橫前林幽懷杳不極清風吹我襟

孫愷似云

韋柳遺韻

金塗一首

寄友

楊花落盡草萋萋
楚客傷離思轉悽
佳節一年寒食過
亂山千疊子規啼
虞翻去國身全老
王粲登樓賦幾題
相約天涯回白首
昭陽江上夕陽低

申 欽一首

寄友

廣陵三月已飛花
漢水孤帆落日斜
新結茅茨分洞府
欲隨麋鹿作生涯
平波細雨催耕犢
曲水游魚上釣叉
舉世盡從忙裏過
似君行樂獨堪誇

權 韞 一首

清明

淑氣催花信輕黃著柳絲人煙寒食後鳥語晚晴時老去還多事春來嬾賦詩京華十年夢惆悵只心知

趙 昱 一首

贈鑑湖主人

十年長掩故山扉塵土東華幾染衣想得鑑湖春夜月子規應喚不如歸

李孝則一首

烏嶺

秋風黃葉落紛紛
主屹山高半沒雲
二十四橋鳴咽水
一年三度客中聞

柳永吉一首

福泉寺

落葉鳴廊夜雨懸
佛燈明滅客無眠
仙山一到傷春暮
烏帽欺人二十年

魚無迹一首

逢雪

馬上逢飛雪孤城欲閉時
漸能消酒力渾欲凍吟髭
落日無留景栖禽不定枝
灞橋驢背興吾與故人期

李嶸一首

題僧軸

流雲山口草萋萋
夜逐香煙到水西
醉後高歌答明月
江花落盡子規啼

金宗直一首

佛國寺

為訪招提境松間紫翠重青山半邊雨落日上方鐘語
與居僧軟杯隨古意濃頽然一榻上相對鬢鬢鬆

李承召一首

詠燕

畫閣深深簾額底雙飛雙語復雙棲綠楊門巷春風晚
青草池塘細雨迷趁蝶有時穿竹塢壘巢終日啄芹泥

託身得所誰相侮養子年年羽翼齊

鄭 碣一首

聞笛

迢迢沙上人初疑雙白鷺忽聞橫笛音寥亮江天暮

朴文昌一首

題郭山雲興館畫屏

萬頃滄波欲暮天將魚換酒柳橋邊客來問我興亡事
笑指蘆花月一船

李達一首

病中對雨

花時人病閉門深
強折花枝對酒吟
悵悵流光夢中過
賞春無復少年心

李植一首

泊漢江

春風急水下輕艫
朝發驪陽暮漢江
篙子熟眠雙櫓靜
青山無數過船牕

朴 澗 一 首

平壤大同館題壁

高句驪起漢鴻嘉宮殿遺墟草樹遮惆悵乙支文德死
國亡非為後庭花

詩話書序賄肅慎之命孔安國傳云海東諸
駒驪扶餘駙貊之屬武王克商皆通道焉按駒
驪主朱蒙漢元帝建
昭二年始建國號

姜克誠 一 首

湖堂早起

江日曉未生蒼茫十里霧但聞柔櫓聲不見舟行處

鄭之升一首

留別

細草閒花水上亭綠楊如畫掩春城無人為唱陽關曲
惟有青山送我行

姜渾一首

贈妓

雲鬟梳罷倚高樓鐵笛橫吹玉指柔萬里關山一輪月

數行清淚落伊州

金淨一首

旅懷

江南殘夢晝厭厭
愁逐年華日日添
鶯燕不來春又去
落花微雨下重簾

鄭知常一首

醉後

桃花紅雨鳥喃喃
繞屋青山間翠嵐
一頂烏紗慵不整

醉眠花塢夢江南

李仁老一首

題杏花鸚鵡圖

欲雨未雨春陰垂杏花一枝復兩枝問誰領得春消息
惟有鸚鵡之與鵲之

李子敏一首

子敏未詳何官

姚園客云萬歷庚戌仲秋值朝
鮮貢使遇人贈高麗紙扇上題

有詩稱辛丑秋
東岳李子敏作

賀聖節詩

九達初日五雲覃虎拜彤庭百辟參黼黻星辰璇極北
梯航玉帛越裳南河清適際千年一嵩壽齊呼萬歲三
遐壤小臣陪舞獸內尊偏倚主恩酣

朝鮮主試官一首

嘉靖七年朝鮮人過風飄至南通州被拘于守
禦所訊之乃其國主試官有詩

詩

白浪滔滔上接空布帆十幅不禁風此身若葬江魚腹
萬里孤臣一夢中

孫谷集詩 五首

不詳其名

渡清川江

安州城外水如天立馬沙頭喚渡船帆帶晚烟依草岸
鴈迷殘日下蘆田長塗旅客思歸計向老筋骸憶少年
始信在家貧亦好近來雙鬢轉蕭然

題清道李家壁

南來數月計多違，節序如流已授衣。
旅舍不堪黃葉落，暮天遙望白雲飛。
沙梁鴈下寒江渚，門巷烟深苦竹扉。
唯有同來野僧在，病吟相對話西歸。

客懷

此身那復計西東，到處悠悠逐轉蓬。
同舍故人流落後，異鄉新歲亂離中。
歸鴻影度千峯雪，殘角聲飛五夜風。
惆悵水雲關外路，漸看芳草思無窮。

贈樂師許憶鳳

雙眉覆眼鬢蕭蕭
曾捻梨園紫玉簫
移向瑤臺彈一曲
曲終垂淚說先朝

悼亡

妝奩蟲網鏡生塵
門掩桃花寂寞春
依舊小樓明月在
不知誰是卷簾人

梅月堂詩一首

和鍾靈山居詩

蛺蝶雙雙舞藥畦
薔薇架架采登梯
一叢枸杞花初徧
五極人葭葉已齊
翠竹林中香麝睡
紫荊枝上畫眉啼
千峯昨夜疎疎雨
不分南池漲入溪

洛師浪客一首

安定館北驛

四月關門路風沙
氣慘悽河邊春鴈
盡林外曉鶯啼去
國魂長往思家意
轉迷羸驂經左道
今日向安西

無名氏一首

沈駙馬碧波亭

貴主華亭入翠微
碧牕朱拱有光輝
春來波暖魚龍出
夜久星疎烏鵲飛
海上乘查時貫月
江邊積石舊支機
當筵勸酒先投轄
不醉應知客不歸

月山大君婷一首

詩話婷詩一首見吳子魚朝鮮詩選錢遵王云
應是朝鮮女子按說文廣韻均不載有婷字惟
玉篇有之注徒寧切和色也樂府詩集漢辛延
年羽林郎篇不意金吾子娉婷過我廬娉婷字
並用始此江南弄和云陽春路娉婷出綺羅喬
知之詩明珠十斛買娉婷杜甫詩不嫁惜娉婷

劉長卿不知娉婷色回照今何似韓愈詩砧影
伴娉婷白居易詩明妃風貌最娉婷李商隱詩
娉婷小苑中羅虬詩大都相似更娉婷則唐人
固相沿用之載考丁度集韻姁或作娉可補廣
韻之闕采風集收娉詩娉上冠以月山大
君字當是東國尊稱殆非民間女子也

古寺尋花

春深古寺燕飛飛深院重門客到稀我正尋花花盡落
尋花翻為惜花歸

成氏一首

竹枝辭

灤東灤西春水長郎舟已去向瞿塘巴江峽裏啼猿苦
不到三聲已斷腸

俞汝舟妻一首

贈別

恨別逾三歲衣裘獨禦冬秋風吹短鬢寒鏡入哀容旅
夢風塵際離愁關塞重徘徊思遠近流歎滿房櫳

趙瑗妾李氏二首

詩話瑗官學士承旨死倭亂妾李自號玉峯主
人詩如兩兩鸛鵒失舊磯銜魚飛入菰蒲去亦

佳句
也

采蓮曲

南湖采蓮女日日南湖歸
盪槳嬌無力水濺越羅衣
無心却回櫂貪看鴛鴦飛

自適

虛檐殘溜雨纖纖枕簟輕
寒曉漸添花落後庭春睡美
呢喃燕子要開簾

許景樊
五首

景樊字蘭雪葑筠之妹適進士金成立後成立

殉國難遂為女道士有集

陳卧子云許氏學李氏而合作有盛唐之

風外藩女子能爾可見本朝文教之遠

詩話明閨秀詩類多偽作轉相附會久假不歸
如今日相逢白司馬樽前重與訴琵琶吳中范
昌朝題老伎卷也詩載皇明珠玉而謬云鐵氏
二女寒氣逼人眠不得鐘聲催月下迴廊三泉
王佐宮詞也詩載石倉詩選而假稱宮人媚蘭
泉流不歸山羅文毅作而謂甄節婦詩誰言妾
有夫高侍郎作而謂章恭毅母他若忽聞天外
玉簫聲寧獻王權之詠權妃即指為權貴妃作
風吹金鎖夜聲多羅翰林環之詠秋怨遂誣為
王莊妃詞甚至析情字為小青弔青冢者過孤

山而流連託聯句於薛濤刻濤集者綴卷尾而
剗剗助談小說貽笑通人吾於許景樊之詩見
其篇章句法宛然嘉靖七子之體裁未應
風教之訖符合如是不能無贗鼎之疑也

望仙謠

王喬招我游期我崑崙墟朝登玄圃峯遙望紫雲車
雲車何煌煌玄圃路茫茫倏忽凌天漢翻飛向扶桑扶桑
幾千里風波路阻長吾欲舍此去佳期安可忘君心知
何許賤妾徒悲傷

次伯兄高原望高臺韻

層臺一柱壓嵯峨西北浮雲入塞多
鐵峽霸圖龍已去穆陵秋色鴈初過
山迴大陸吞三郡水割平原納九河
萬里登臨愁日暮醉憑青嶂獨悲歌

次仲兄筠高原望高臺韻

崔嵬雲棧接青霄峰勢侵天作漢標
山脈北臨三水絕地形西壓兩河遙
烟塵暮卷孤城出苜蓿秋深萬馬驕
東望塞垣鼙鼓急幾時重起霍嫖姚

效崔國輔

妾有黃金釵嫁時為首飾今日贈君行千里長相憶

雜詩

精金明月珠贈君為雜佩不惜棄道旁莫結新人帶

安南

詩話安南曾為郡縣漸文治者深而其國人詩
選家多置不錄予從李文鳳越嶠集擇其詞旨
剛雅者
著於篇

國王黎灝一首

灝一名思誠天順四年國人所立卒私謚淳皇

帝僭號聖宗

送錢學士溥歸朝

五嶺天高瘴霧開，詔書飛下越王臺。
萬年重紀黃龍瑞，九譯爭看白雉來。
曉日珠崖標柱在，秋風銀漢使查回。
吾君若問交南事，久已傾心仰上台。

黎景徽一首

景徽文職大頭目，僭左僕射。

奉贈錢學士

紫殿承恩入夢頻歸鞭裊裊向天津
蘋袍色映千山曉
玉節光回萬井春
五嶺風輕金勒緩
三湘月白錦帆新
夜闌宣室如前席
為道交南共帝臣

阮直一首

直爵里未詳

送錢學士還朝

曉日初開瘴霧空
歸程馬首正秋風
知音豈限珠厓北
惜別那禁珥水東
上國有人還獻納
遐方無事賴帡幪

他年兩地如相憶萬里懸情寄塞鴻

黃清一首

清僭吏曹侍郎

送錢學士還朝

公望端堪邁俊豪遠持使節效賢勞
九霄日月瞻依近萬里江山興詠高
別酒頻斟情戀戀歸心莫遏水滔滔
自從回首天南後幾度懷人正鬱陶

黎念一首

念大頭目

送湛內翰還朝

綸音讀罷紫泥封回首蓬萊第一峯
望外交關千里月夢中帝闕五更鐘
星查迢遞歸程遠雲樹參差別思濃
南浦吟成憑寄語滔滔江漢共朝宗

阮澤民一首

澤民爵里未詳

送湛內翰還朝

目送星軺萬里旋那堪惜別思淒然交關此日分岐後
南北春風共一天

安南使臣一首

題南康縣南野

鼓報黃昏各泊船
咿咿軋軋櫓聲連
一雙鳬鴈滄浪外
幾箇人家楊柳邊
紅日落殘鈎挂月
白雲卷盡鏡磨天
安南萬里朝天客
暫借郵亭一夕眠

占城

貢使二首

進貢初發占城

行盡河橋柳色邊
片帆高挂遠朝天
未行先識歸心早
應是燕山有杜鵑

江樓留別

青嶂俯樓樓俯渡
遠人送客此經過
西風揚子江邊柳
落葉不如離思多

詩話近峯聞畧載占城使臣寓蘇州之天王堂
門葵花何名人給之曰一丈花也即題詩曰花

於木槿渾相似葉比芙蓉只一般五尺闌干遮
不住獨留一半與人看按此乃實應陶成題李
西涯館中
葵花之作

日本

噶哩嘛哈

或作荅黑
麻一首

詩話高帝惡倭不恭示以欲征之意日本進表
辭頗不遜命噶哩嘛哈上表帝問其風俗荅五
言詩既而絕其貢考日本疆域時拓地八道六
十六州六百一十三郡八十二浦宜其不知漢
大而云國比中原國也若其人多壽就國王論
如神武天皇一百二十七歲孝昭天皇一百十
八歲孝安天皇一百三十七歲孝靈天皇一百
十五歲孝元天皇一百十七歲開化天皇一百

十五歲崇神天皇一百二十歲垂仁天皇一百四十歲景行天皇一百有六歲成務天皇一百有七歲神功天皇百歲應神天皇仁德天皇俱百有十歲雄略天皇百有四歲降年之永中土所希所云人同上古人言雖大而非夸矣惟是國俗無冠國王但著烏帽直而頂圓銳高半尺以綃為之男女笠用蒲或竹或稻木謂為唐制度夫豈其然至若天皇之子娶於其族夫死妻立兄死妹立子死母立何禮之有明祖絕其貢使不亦宜乎

答大明皇帝問日本風俗

國比中原國人同上古人衣冠唐制度禮樂漢君臣銀甕笏清酒金刀鱠紫鱗年年二三月桃李自陽春

普福一首

宣德七年倭船入貢凡九艘其使普福迷失於
樂縣沙嵩藤嶺獲解

被獲歎懷

來游上國看中原細嚼青松咽冷泉慈母在堂年八十
孤兒為客路三千心依北闕浮雲外身在西山返照邊
處處朱門花柳巷不知歸日是何年

中心叟一首

叟日本使臣

弔郭璞墓

遺音寂寂鎖龍門此日青囊竟不聞
水底有天行日月墓前無地拜兒孫
秋風野寺施香飯夜月漁燈照斷魂
我有誄歌招不返停船空見白鷗羣

詩話葬師言禍福多本於景純之經然試與百人分謀之無一人同者所云龍穴砂水向背如杓鑿齟齬之不相入其說業已難擇加以目者配以年神方煞吉神祇百二十凶神倍之規避實難以是不克葬者多矣世傳景純墓在金山足過於詭奇沈啓南詩氣散風衝豈可居先生

埋骨理何如日中數莫逃兵解世上人猶信
書如叩晨鐘寐者可以發深省矣中心叟墓前
無地拜兒孫一語亦足發笑詩載廬陵胡經用
甫金山志志成於正德辛巳文待詔徵仲序之

無名氏一首

春雪

昨夜東風換北風釀成春雪滿長空梨花樹上白添白
杏子枝頭紅不紅鶯問幾時能出谷燕愁何日得泥融
寒冰鎖却秋千架路阻行人去不通

釋天祥 三首

寄南珍

上人居處僻心與石泉清
道在從違俗身閒不用名
空階松子落雨徑蘚花生
怪得稀相見年來懶到城

長安春日

何事長安客春來思易迷
樂游原上草無日不萋萋

榆城聽角

十年游子在天涯一夜秋風又憶家
恨殺葉榆城上角
曉來吹入小梅花

釋機先二首

送別

天書召賈生匹馬出滇城
白首相逢處青雲送別情
山經巫峽盡水到楚江平
好獻治安策殷勤荅聖明

挽逮光古先生

昨日來過我今朝去哭君
那堪談笑際便作死生分
曠達陶徵士蕭條鄭廣文
猶憐埋骨處西北有孤雲

明詩綜卷九十五



總校官庶吉士 臣 張能照

校對官檢討 臣 蕭九成

謄錄貢生 臣 傅瓌芳

欽定四庫全書薈要

集部

明詩綜卷九十八

六至

詳校官編修臣汪鏞



欽定四庫全書薈要卷二萬五百六十九

集部

明詩綜卷九十六

无名子

翰林院檢討朱彝尊編

潯州士女

相思曲 二首

妹相思不作風流待幾時只見風吹花落地不見風吹

花上枝

王貽上云雖侏儒之音與樂府子夜讀曲相近

妹相思蜘蛛結網恨無絲花不年年長在樹孃不年年

伴女兒

靜志居詩話此曲載吳洪粵風續九
是潯州士女所歌廣東新語亦有之

廣東歌堂詞

道別 三首

采蓮去時江水深
采蓮歸時江樹陰
中間日出四邊雨
記得有情人在心

歲晚天寒郎不回
厨中烟冷雪成堆
竹篙燒火成長炭
炭到天明半作灰

老龍山下有狂風老龍山上月朦朧
檳榔勸郎郎不醉
辜負奴顏一點紅

翰林館課

原心亭詩

鬱鬱松樹枝肅肅冬日陰孤亭弘且敞乃在鳳池潯鳳池超人寰萬籟無一音暫息塵中轍因鮮俗慮侵端坐邈宇宙掩帙忘古今頓令羣動祛見此方寸心金門足大隱豈必謝纓簪

白頭閒話

感述

詩話是篇不知誰氏所作或
有感於焦黃中張懋修輩乎

御史大夫湯御史大夫周兩人皆酷吏寸心操戈矛蔽
賢者無後其語盖有由如何安世禹顯爵封通侯有子
駢且角乃產自犂牛思之復思之天道亦有私

單縣父老

漢河懷古

漢河在單縣源出汴水下流通
沛以漢高還沛曾涉此故名

王氣豐沛間濬源自單父風雲昔飛揚萬乘歷茲
土富貴歸故鄉意本重瞳羽誰知錦衣行在漢不
在楚

粉墨春秋

非仲藏宋溫日觀蒲萄

錢塘江潮三日斷翠華遙遙六宮散茫茫黑霧覆厓
山二龍無聲泣天畔衣冠南渡靖康年忍見旄頭明
夜半冬青雪冷子規啼尚有遺民溫日觀閱閱姓名

知是誰有身但向浮屠竄酒酣獨抱支離叟罵賊猶
存目光爛依稀八法素師傳蒲萄餘技留篇翰馬乳
曾無塞上塵鰕鬚尚似江南岸涼雲不共荔支殘景
風難並櫻桃薦莫道驪珠顆顆圓萇弘碧血光零亂
三百餘年歎息同何人對此非河漢借問苦心愛者
誰我友張君獨悲歎神物一去何繇還觸目皆非氣
凋換吁嗟張君且勿歎墨花會見虹蜺燦涼州美酒
共天家大叫忠魂歌復旦

瀟湘集

洞庭秋月

纖雲不動金波浮
冷光萬里開清秋
青山一髮渺無際
天影落鏡星河流
中流無人萬籟寂
夜深往往魚龍出
何人長笛在扁舟
水遠天長露華白

渭臺漁父

喜艾純卿至

何日離青海
春過北斗城
亟須譚間闊
深足慰交情
雨

雪辭關塞風塵送客程投荒君最苦早有二毛生

潼川碑

題石鏡寺

州志成化三年蜀僧繼圓
於草莽中得碑刻此詩

昔日朱輪守經過釋子家柱間留墨蹟泉下隔年華雲
去空雕檻風來卷白沙江山誰似畫每到動吁嗟

天目游人

宿重雲菴

烟蘿一徑通宴坐白雲中樹影晴浮水秋聲半在空疎

鐘山際月高枕竹邊風竟夕渾無寐清談對遠公

藕花社僧

嘉興白蓮寺僧有藕花社詩集不知其名

山居

滄海歸來日貪看麋鹿羣
牕虛含遠嶂屋破補重雲
夕鳥吟邊過春蔬雨後分
不須憐閒寂清梵隔山聞

玉華山樵

不知何許人
洪武初寓東陽之東山
披麻戴笠

散步閒吟于山水間終不肯言姓名或云陳友
諒客友諒亡遁跡至此遺詩百篇孫石臺揚序
之名玉華遺橐

和韻荅玉山呂誠中

窮途往往白頭新誰謂綈袍念故人此日不須辭舊雨
空山聊自度殘春艱難作客仍多病生死無家任此身
二十年来相憶處幾回月夕與風晨

野亭老父

桐城劉燾成化間與友人同赴省應選貢塗中
風雨驟至因解裝暫憩野亭共賦送春詩忽一
老父衣蓑荷笠至聞吟詩亦請筆硯頃刻詩成
云云

怨風怨雨總皆非
風雨不來春亦歸
蜀魄啼殘花影瘦
吳蠶喫盡柘陰稀
枝頭綠軟梅初熟
口角黃乾燕學飛
我亦欲歸歸未得
擔頭猶挂舊蓑衣

萊山樵者

濬縣眺望

河流遠徙大伾存極目中原野色昏黍稷油油迷故國
羝羊逐逐過前邨黃花冷笑三秋客紅葉初飛十畝園
賴有淹留同調在芒芒禹跡試重論

明詩鼓吹

題金陵沙士清樂清軒

竹裏行厨竹外門宛然風景似山邨石闌柳暗藏新雨
詩壁苔荒沒舊痕林下鳥鳴花自落溪頭鹿過水偏渾

晚來半掩東軒卧一枕
黎雲鎖夢魂

戴斗夜談

書玉田行館

老去年華暗自驚殊方節序倍關情
蕭條旅館孤燈宿迢遞歸塗白髮生
海甸星河分歲色山樓鼓角動春聲
柳盤柏徑誰相識悵望鄉原北斗橫

丹川

李時遠云丹川不知何許人曾官給
舍轉御史集不書撰人無前後序

棧道早行效白香山體

連雲石磴曉蒼蒼天險分明百二強萬里西南通鳥道
雙旌上下轉羊腸一溝流水一溝竹幾樹垂楊幾樹桑
登覽不知行役倦半生詩債却摘償

雲谷樵夫

書大道寺壁

西華雲臺去路長投閒翻為看山忙十年有夢尋中岳
四月披雲過太行清世誰能便吏隱幽栖吾獨愛僧房
昨來不寐焚香坐讀盡楞嚴夜未央

黃州志

赤壁寫懷

武昌東下次江皋赤壁磯頭艤畫橈
廢壘烟消荒草合橫江鶴去碧天遙
岸邊漁父疑殘炬水底龍吟憶洞簫
往事千年增感慨荻花楓葉晚蕭蕭

昌平州志

仙人洞

石洞窅且深花落無人埽
仙翁去不還何處尋瑤草

虎谷

虎谷名金山客行初未識日午山下過人面

一作衣

黃金

色

銀山

銀山本在北萬丈青雲梯曉見居庸雪銀山忽在西

龍泉

瀾瀾山下泉滌洄白如玉清以濯吾纓濁以濯吾足

安濟橋

石梁跨飛虹水清魚可數莫謂非通津亦有江南估
長安可游記

題西山清涼寺壁

山僧汲空潭驚起二龍子百里雲冥濛三日雨不止

青溪踏雪志

題西山水盡頭

雙流泱泱鳴石根失其一棄穰於此中應從玉泉出

南靖老人

題壁

青青千里草隱隱獨家邨日暮客投宿山深虎守門

吳下人

詩

僕夫不識路踟躕道傍久寒風吹衣襟落日照馬首

屠生一首

蕭山諸生屠姓失其名居近西子祠題詩於壁
是年學使者夢一婦人謂曰吾西施也生未入

五湖而蕭山屠生輒妄言其為吾斥之既按部
詢生生大驚誦其詩歎曰詩固佳然已失實乃
令生詣祠謝已為文以祀之

題西子祠壁

紅粉溪邊石年年漾落花五湖烟水闊何處浣春紗
南潯祇園寺詩

贈老僧

清溪通笠澤地以水為鄉竹青三日雨僧白一頭霜

張叟

叟嘉興人不知名

秋思

江上芙蓉開江上芙蓉謝開謝總秋風江流無日夜

盱眙女郎

題壁

短袖籠春去低鬟明月中逢人惟有淚不敢說遼東

正德中朝士

上長沙相公

才名直

一作少

與斗山齊伴食

一作三考

中書日又

一作已

西回

首湘江春草綠
鷓鴣啼罷子規啼

石淙集附錄

題邠州郵亭壁

太宰西征秉將權
三秦豪傑滿軍前
中筵笑指金貂客
盡是當年舊執鞭

永壽監軍莊郵亭題壁

金符玉節催征騎赤日炎天渡大江塞上風清連瀚海
六羸驚見舊旌旌

荆先生

不知何許人客濟寧人有持白團扇撲蠅為血
所漬因繪為紅葉題詩云云人遂目之為荆紅
葉

題紅葉

新霜楓葉醉殷紅記得題詩出後宮繞遍御溝尋不見

被風吹入月輪中

黃州志

武磯山

寂寞武磯山上樹蕭條
邏阜水中天垂楊不管人間事
猶自青青兩岸邊

廣西舊志

題義寧華嚴洞

跨鶴歸來不計年
洞中流水綠依然
紫簫吹徹無人見

萬里西風月滿天

殊勝寺道人

嘉靖初平望鎮殊勝寺有一道人來游題其壁
云云後倭人至鎮寺首焚毀

題壁

我自蓬萊跨鶴回山僧不遇意徘徊時人莫解菩提寺
三十年餘化作灰

福教寺僧

嘉靖初魏國公侵武進縣福教寺田僧乃棄去
後過寺題詩云云

殘山剩水一荒基古寺烟籠白塢低燕子不知身是客
秋風還戀舊巢泥

黃圖雜志

直沽櫂歌

三首

天妃廟對直沽開津鼓連船柳下催釃酒未終舟子報
舵樓黃蝶早飛來

雲帆十幅下津門
日落潮平不見痕
葦淀茫茫何路泊
一燈明處有漁邨

蘼蕪楊柳綠依依
檣燕檣鳥立又飛
賺得南人歸思緩
白魚紫蟹四時肥

溧縣志

白河漁舟

溶溶漾漾白河流
點點輕鷗上水浮
遙望孤燈明滅處
葦花斷岸一漁舟

浦城志

南浦

南浦春流漲綠波
溶溶漾漾浴鷗多
銷魂尚記江淹賦
碧草青苔送別何

資江石刻

書石溪亭

桃花依舊放山青
曲几焚香對畫屏
記得當年春雨後
燕泥時污石溪亭

洞庭老人

卓彥恭月夜泊洞庭有老人盪小舟過之歌詩
云云見小草齋詩話

歌

八十滄浪一老翁
蘆花江上水連空
世間多少乘除事
良夜月明收釣筒

玉堂逐客

題西禪寺詩

隔江人唱浪淘沙月上梧桐影未斜客到潯陽談往事
青衫無淚濕琵琶

耳園公

君山

山色湖光日漸曛誰將玉珮弔湘君天風一夜連湖起
吹落蒼梧萬里雲

花鏡雋聲

踏燈詞

髻挽烏蠻試晚妝
衫裁白氎學霓裳
私邀女伴門前立
不避燈光避月光

盤江逋客

題分水關

一道泉分兩道泉
層層松栝翠參天
鷓鴣聲裏山無數
合向誰家草閣眠

碧岡道人

堯渡

秋水初平露石磯
堯城渡口柳依依
無端隔岸漁歌起
白鳥一雙撲鹿飛

不出戶庭錄

題陳山壁

啓牕日日對青山
山色青青不改顏
我問青山何日老
青山問我幾時間

陳墅里人

江陰陳墅里有郭姓者失其名題詩於壁

春日偶題

細細冥冥濕燕泥
棟花香暖鶉鳩啼
籬邊筍迸無多日
恰與茅簷一丈齊

電白老兵

一首

題城樓

畫角吹來歲月深
譙樓無古亦無今
不如歸我龍山去
萬竹青青何處尋

靈谷寺壁上詩

九日

風雨蕭蕭戶未開
忽聞鄰叟負薪回
自言今歲登高便
曾上鍾山絕頂來

鍾山野老一首

風香閣

風香高閣倚層厓
一老扶筇下薜蘿
階獵火夜來驚鹿過
松根拾得舊銀牌

高百戶

百戶嘉興人遺其名

閩歸簡吳巨手

半牀書卷剩山河如此歸來可奈何
便欲與君同一醉梅花不比舊時多

湘中女子

繫左臂詩

生來誰惜未簪笄身沒狂瀾命不齊
河伯有靈憐薄命

東流直繞洞庭西

王仰止云湘中女子名氏不傳第知為湘江人其沈江也逆流至湖南水

濱顏色如生左臂繫素帕
十絕句閩人林古度跋之

明詩綜卷九十六

欽定四庫全書薈要卷二萬五百七十

集部

明詩綜卷九十七

雜流 僣從附

翰林院檢討朱彝尊編

靜志居詩話明以賈客而稱詩者衆矣若歙州之鄭作程誥龍游之童珮皆賈也然鄭程皆受學于李空同童執經于歸太僕則不得以賈人目之故錄雜流自谷淮以下而僣從之能詩者焉 附

谷淮 三首

淮字文東秦中賈人客淮揚間傭書給事澄江

張學士家

顧元言云谷郎能仿文徵仲書法兼善音律日以文翰為業其家詆為書

癡其詩殊

有雅致

寄遠

瓊花臺上雨初收
黃歇山前水急流
莫道別來鄉國遠
南江愁是北江愁

病中

一貧成病竟年年
愁入蒼茫歲暮天
客至擁衾聊起坐
冷風吹雨濕牕前

題畫

十月山家落木稀
高牕終日見雲飛
柴關地僻無人到
獨向峰頭抱犢歸

李東白一首

東白京山人為衣工

姚園客云東白黃鶴樓詩秋在仙人鐵笛中一語可

云絕唱李宗定恒誦之後游秣陵歸舟至雲夢澤中蒿臺寺自吟云好水好山來路遠秋風秋雨到家遲拍手一笑墮水而死

登黃鶴樓

西望家山一改容
白雲飛盡楚江空
興饒老子胡牀上
秋在仙人鐵笛中
鄂渚霜花沿岸白
漢陽楓樹隔江紅
倚闌拍手招黃鶴
千古登臨感慨同

盧 澐 一首

澐字宗潤鄞人義烏縣吏有月漁集

詩話月漁託身文無害尋即棄歸以醫自給有
邀之治疾者見壁上詩和之繞榻吟哦至旦主
人以為怪不服其藥每得金置袖中為人探去
不知知亦不問也故人有知黟縣事者徒步萬
山中訪之距縣百里而病夜夢挽其髮盡變為
黃絲寤而語人曰色絲為絕吾死矣夫果死于

客舍平居語沈嘉則曰古人旅葬裸葬無所不可何必故鄉嘉則因買山於休寧東郭外葬焉
題曰詩人
廬九之墓

西亭同朱近臣送沈嘉則

送君江上行路近梅根渚雨急天欲昏不盡別時語

周俊五首

俊字伯英江陰賈客有南岑集

詩話伯英詩頗清越如海風吹雨散江月伴潮
生亂鷗千樹曉新水一篙秋水酒薄於水漁燈
密似螢風前雙鬢逢秋短海上
孤城過雨寒俱出塵埃之表

蕪城對酒寄懷張淡雲校書

樓上春雲黯夕陰
折花載酒偕同心
芙蓉繡幄隱紅燭
美人一笑輕千金
南浦別離情脈脈
柳花繚亂風無力
愁來獨上廣陵城
江水微茫天一色

吳陵暑夕

斷虹收宿雨
大火欲西流
一片水浮月
三更人倚樓
簾葭迷白露
蟋蟀響清秋
惆悵江南北
年年事薄游

鵝鼻磯

細雨晚山晴殘霞映江樹不見垂綸人寒潮自來去

春日雜詠

春來嬾慢起常遲六尺枯藤強自支忽見柳花飛作雪
小橋回首立多時

贈張淡雲

星河淡淡夜迢迢深院涼生動絳綃傳得揚州新樂府
倩誰人並坐吹簫

黃徽一首

徽字季美杭州人為閩賈沈翁贅壻繼其業有

穀音

詩話季美詩何侍郎穉孝稱之為作詩賈傳其畧曰唐人以詩名桑門閨秀皆進乎技賈人缺焉季美詩不妨賈賈不揜詩遂無前人其賞譽若是

竹崎

水口薜亭官長在搜鹽日午喚停船平明舍櫂山城外
竹轎迎人又索錢

李 佶一首

佞扶溝人

江行有懷

醉起意不盡江邊尋杜蘅折來何所寄游子在西京惜
別三春晚窮年百慮生日斜空悵望一水隔盈盈

馬來如一首

來如內鄉人翰林李袞之僕

江上懷吳人朱侍山久羈均陽

江草江花一水長憐君何事滯均陽逢人為報鄉園侶

吳客而今作楚狂

李

英

三首

英字少芝以青衣給事南海歐大任

俞汝成云計有功唐

詩紀事二百餘年詩人千一百五十家而卷末有僕二人一為咸陽郭氏捧劍之童一為池陽刺史戟門門子朱元余輯盛明百家詩僅得李英一人可以為難矣宋轅文云李生詩清勁可誦能宗其主人

初去故園留別諸友

風煙一以別把酒戀同游人去江樓晚帆飛海國秋青

山馳遠夢黃菊動離愁曾是滄洲客能無念白鷗

秋思

曾是滄洲舊釣徒西風落魄寄江都望中故國千山阻
別後經年一字無庾嶺烟霞秋思遠楚天風雨暮帆孤
誰憐飄泊他鄉客不為尊鱸滯五湖

十月京師紀事

蕭關風急馬頻嘶四塞河山動鼓鼙獨立高臺望烽火
蘆笳多在薊門西

林汝元二首

汝元閩王粹夫家青衣

詩話錫山俞汝成輯盛明百家詩錄青衣一人
南海李英也虞山列朝詩集益以二人扶溝李
佺內鄉馬來如余錄詩綜又益一人閩林汝元
也聞閩中青衣善詩者不止汝元尚有陳香初
陳竹逸鄭蘭子三人未詳其名澄江楓葉老斷
岸菊花疎香初句也月明黃葉露花隱赤闌橋
蘭子句也古墓梨花鵲雨荒原麥穗
鷓鴣天竹逸句也附疏于此當博訪之

溪行

雪壓梅花破霜侵楓葉稀林間黃犢卧沙際白鷗飛水

急灘聲亂溪迴樹影微前峰新月吐樵子蹋歌歸

京口夜泊

隱隱漁歌隔岸聽娟娟新月照中泠江南風景今宵始
回首瓜洲一抹青

胡梅 二首

梅字白叔吳人給事徐通政申宅晚瞽以醫自
給自號清壑道人

詩話白叔幼而秀穎以孤旦登場四坐叫絕徐
通政維嶽俾掌書史嘗取通政友人尺牘畀之

炎火為通政誦
之不遺一字

沈璧甫自城南移居虎丘和周安期韻

君住南城已數年
今移虎阜寺門前
紅疎未補薔薇架
綠滿初停茉莉船
雨過峰頭流一壑
月明隄上聽三絃
酒壚餅肆皆鄰近
我欲頻來莫惜錢

曉飯小孤山下

兩岸黃蘆霜滿船
推篷曉爨鷺鷥前
小孤山下風初定
江面剛生一寸烟

吳忠一首

忠華亭姚元龍宅青衣陳徵君繼儒賞其桃花
詩勸其辭主人送至小崑山為焚香道者

詩話余既錄二李一馬之詩又益以胡白叔閱
東吳舊話又得吳忠一人按徐文長逸稿有詩
云南海大夫歐泉州處士尤泥中雙綠鬢詩伴
兩蒼頭自注尤山人侍者范鹿能詩不減歐楨
伯之僕惜其
稿不得見也

桃花

游子訪桃源桃源在深處不用問漁郎谷口隨花去

明詩綜卷九十七